



列傳卷第三十二

宋史二百七十三

開府儀同三司上柱國錄軍國軍事前書右丞相監修國史領經筵事都總裁臣脫等奉

勅修

李進卿

子延渥

楊美

何繼筠

子承矩

李漢超

子守恩

郭進

牛思進附

李謙溥

子允正

姚內斌

董遵誨

賀惟忠

馬仁瑀

李進卿并州晉陽人少以驍勇隸護聖軍晉天福中

杜重威帥師敗安重榮於宗城進卿力戰有功擢為

興順軍校周祖開國命領所部兵戍靈壽久之遷龍

捷指揮使顯德初從世宗戰高平改鐵騎指揮使歷散員左射都校改鐵騎及內殿直都虞候宋初領貴州刺史三遷鐵騎左廂都指揮使領乾州團練使乾德初遷控鶴左廂都指揮使改漢州團練使三年轉虎捷左廂都指揮使領澄州團練使是歲冬伐蜀以進卿為歸州路行營步軍都指揮使拔巫山砦下夔萬二州蜀平錄功拜侍衛親軍步軍都虞候領保順軍節度開寶二年太祖親征河東留進卿為在京都巡檢潁州刺史常暉滿州刺史韓光憲分為河南北巡檢及還改親軍馬軍都虞候六年遷步軍都指揮使領靜江軍節度卒年五十九贈侍中子延渥延信延信至內殿崇班

延渥以蔭補供奉官尋為閤門祇候三遷至西京左藏庫使咸平初歷知平戎寧邊順安軍保州威虜軍鈐轄又知冀州六年徙瀛州景德初契丹大舉擾邊經胡盧河踰關南十月抵城下晝夜鼓譟四面夾攻旬日其勢益張唯擊鼓伐木之聲相間驅突人負板秉燭乘墉而上延渥率州兵強壯又集巡檢史普所部乘城發礮石巨木擊之皆壘壘而墜殺傷甚眾翌日契丹王與其母親鼓衆急擊發矢如雨延渥分兵

拒守益堅契丹遁去死者三萬餘傷者倍之獲鎧甲
兵矢竿牌數百萬驛書以聞賜延渥錦袍金帶將士
緡錢遷延渥本州團練使以通判太子中允陸元凱
為國子博士賜緡推官李翔為太子中允錄事參軍
蔡亨為右贊善大夫侍禁兵馬監押王誨殿直貝冀
同巡檢史普為內殿崇班充職如故初戍棚垂板護
城纜數寸許契丹射之矢集其上凡二百餘及請葺
城詔取板視之真宗頗稱其勞又聞城守之際陸元
凱流矢中面史普勇敢不避敵復遷元凱屯田員外
郎普尚食副使普尋卒又錄其子昭度為右侍

班
儉為奉職二年延渥徙知邢州歷天雄軍貝州副都
部署知冀貝博三州大中祥符八年入朝以疾連賜
告換右領軍衛大將軍領濱州團練使明年從其請
以左武衛大將軍致仕天禧初卒子宗禹為內殿崇

班
楊美并州文水人本名光美避太宗舊名改焉美狀
貌雄偉武力絕人以豪俠自任漢乾祐中周祖征三
叛美杖策詣軍門求見周祖召與語壯之留帳下廣
順初累遷禁軍大校從世宗征淮南以功擢鐵騎都
指揮使領白州刺史太祖與美有舊即位以為內殿

直都知建隆三年升青州北海縣為軍以美為軍使
 為政尚簡易民皆德之乾德二年召還北海民數百
 詣闕乞留詔諭之不去答為首者始罷遷馬步軍都
 頭會討蜀以美為歸州路戰權左右廂都指揮使蜀
 平遷內外馬步軍副都軍頭領恩州團練使開寶二
 年改領端州防禦使六年加都軍頭領宣州觀察使
 俄授虎捷左右廂都指揮使領河西軍節度會遣党
 進潘美征太原命美為行營馬軍都虞候太平興國
 二年冬出為保靜軍節度三年夏以疾求解官歸京
 師尋醫藥詔遣內侍與道士馬志觀之未幾卒年四

十八贈侍中命中使護葬美為人任氣好施凡得子
 賜及奉祿盡賙給親戚故舊死之日家無餘財人多
 歎息之

何繼筠字化龍河南人父福進歷事後唐至周累官
 忠武成德天平三節度繼筠幼時與群兒戲必分行
 伍為戰陣之象晉初補殿直周祖討三叛表繼筠從
 行賊平改供奉官廣順初福進鎮真定署衙內都校
 嘗領偏師出土門與并人戰斬首數千級以功領欽
 州刺史契丹將高模翰率二千騎擾深冀以葦柈度
 胡盧河繼筠與虎捷都指揮使劉誠誨率兵拒之至

武強獲老稚千餘人模翰道去俄隨福進入朝為內
殿直都知福進卒起復為濮州刺史領兵戍靜安軍
契丹內侵繼筠逆擊敗之改棣州刺史世宗征瓦橋
關命繼筠以所部兵出百井道破并人數千衆恭帝
即位以為西北面行營都監建隆二年升棣州為團
練以繼筠充使三年命為關南兵馬都監乾德四年
加本州防禦使開寶元年秋命昭義節度李繼勳等
征太原以繼筠為先鋒部署至渦河與并人遇擊走
之奪汾河橋敗其衆於城下獲馬五百匹擒其將張
環石贇以獻二年春太祖親征晉陽契丹來援繼筠

時屯兵陽曲縣驛召至行在所授以方略命將精騎
數千赴石嶺關拒契丹謂之曰翌日亭午俟卿來奏
捷也至期帝御北臺以俟見一騎自北來亟遣逆問
之乃繼筠子承睿來獻捷生擒刺史二人獲生口百
餘斬首千餘級馬七百餘匹器甲甚衆初并人恃契
丹為聲援及捷奏太祖命以所獲首級鎧甲示城下
并人喪氣繼筠以功拜建武軍節度判棣州三年來
朝詔賜鞍馬戎仗令戍邊四年秋來朝直發背車駕
幸其第錫賚甚厚未幾卒年五十一帝親臨之為之
流涕從容謂侍臣曰繼筠捍邊有功朕不早授方鎮

者慮其數奇耳今纔領節制果至淪沒良可惜也贈
侍中賻絹五百匹中使護喪令以生平所佩劍及介
冑同葬繼筠深沉有智略前後備邊二十年與士卒
同甘苦得其死力善揣邊情邊人畏伏多畫像祠之
子承矩

承矩字正則幼為棣州衙內指揮使從繼筠討劉崇
擒其將胡澄以獻開寶四年授開府副使太平興國
三年漳泉陳洪進納士詔承矩乘傳監泉州兵會仙
遊莆田百丈寇賊嘯聚承矩與喬維岳王文寶討平
之以功就遷開府使疏為政之害民者數十事上

悉被容納會改使名即為崇儀使五年知河南府時
調丁男百十輩轉送上供綱承矩以為橫役奏罷其
事徙知潭州凡六年因園廩空詔嘉獎之入為六宅
使端拱元年領潘州刺史命護河陽屯兵米信知滄
州以其不習吏事命承矩知節度副使實專郡治時
契丹撓邊承矩上疏曰臣幼侍先臣關南征行熟知
北邊道路川源之勢若於順安砦西開易河蒲口導
水東注于海東西三百餘里南北五七十里資其陂
澤築隄貯水為屯田可以遏敵騎之奔軼俟期歲間
關南諸泊悉壅闡即播為稻田其緣邊州軍臨塘水

四百八十一
者止留城守軍士不煩發兵廣戍收地利以實邊設
險固以防塞春夏課農秋冬習武休息民力以助國
經如此數年將見彼弱我強彼勞我逸此禦邊之要
策也其順安軍以西抵西山百里許無水田處亦望
選兵戍之簡其精銳去其冗繆夫兵不患寡患驕慢
而不精將不患怯患偏見而無謀若兵精將賢則四
境可以高枕而無憂太宗嘉納之屬霖雨為災典者
多議其非便承矩引援漢魏至唐屯田故事以折衆
論務在必行乃以承矩為制置河北緣邊屯田使俾
董其役事具食貨志由是自順安以東瀕海廣袤數

百里悉為稻田而有莞蒲蜃蛤之饒民賴其利淳化
四年擢為西上閣門使知滄州踰年徙雄州御書印
紙錄其功最仍賜以弓劔承矩推誠御衆同其甘苦
邊民有告機事者承矩左右與之款接無所猜忌故契
丹動息皆能前知至道元年契丹精騎數千夜襲城
下伐鼓縱火以逼樓堞承矩整兵出拒遲明列陣酣
戰久之斬馘甚衆擒其酋所謂鐵林相公者契丹遁
去是年春府州嘗敗契丹衆承矩條殺獲以諭州民
或揭於市契丹愧忿故有是役太宗意其輕率致寇
復命與滄州安守忠兩換其任魏廷式使河北得雄

州功狀抗表上言又遣內侍劉勅覈實及麾下士有功者千餘人皆進擢賚賜真宗嗣位復遣知雄州賜承矩詔曰朕嗣守鴻業惟懷永圖思與華夷共臻富壽而契丹自太祖在位之日元帝繼統之初和好往來禮幣不絕其後尅復汾晉疆臣貪地為國生事信好不通今者聖考上以禮當訃告汝任居邊要洞曉詩書凡有事機必能詳究輕重之際務在得中承矩貽書契丹諭以懷來之旨然未得其要咸平二年契丹南侵屢遣內侍以密詔問禦道之計密封以獻嘗詔聽邊民越拒馬河即北市承矩上言曰緣邊戰權

司自洶河至泥姑海口屈曲九百餘里此天險也太宗置砦一十六舖百二十五廷臣十一人戍卒三千餘部舟百艘徃來巡警以屏姦詐則緩急之備大為要害今聽公私貿易則入馬交度深非便宜且砦舖皆為虛設矣疏奏即停前詔屢被手札褒飭三年召還拜引進使州民百餘詣闕貢馬乞借留承矩詔書嘉獎復遣之承矩上言曰契丹輕而不整貪而無親勝不相讓敗不相救以馳騁為容儀以弋獵為耕釣櫛風沐雨不以為勞露宿草行不以為苦復恃騎戰之利故頻年犯塞臣聞兵有三陣日月風雲天陣也

山陵水泉地陣也兵車士卒入陣也今用地陣而設險以水泉而作固建設陂塘綿亘旦滄海縱有敵騎安能折衝昨者契丹犯邊高陽一路東負海西抵順安士庶安居即屯田之利也今順安西至西山地雖數軍路纔百里縱有丘陵岡阜亦多川瀆泉源因而廣之制為塘埭自可息邊患矣今緣邊守將多非其才不悅詩書不習禮樂不可守疆界制御無方動誤國家雖提貔虎之師莫遏犬羊之衆臣按兵法凡用兵之道校之以計而索其情謂將孰有能天地孰得去令孰行兵最孰強士卒孰練賞罰孰明此料敵制

勝之道也知此而用戰者必勝否則必敗夫惟無慮而易敵者必擒於人也伏望慎擇疆吏出牧邊民厚之以奉祿使悅其心借之以威權使嚴其令然後深溝高壘秣馬厲兵為戰守之備修仁立德布政行惠廣安輯之道訓士卒闢田疇勸農耕畜芻粟以備凶年完長戟修勁弩謹烽燧繕保戍以防外患來則禦之去則備之如此則邊城按堵矣臣又聞古之明王安集吏民順俗而教簡募良材以備不虞齊桓晉文皆募兵以服鄰敵故強國之君必料其民有膽勇者聚為一卒樂進戰効力以顯忠勇者聚為一卒能踰

四百八十八
高赴遠輕足善聞者聚為一卒此三者兵之練銳內
出可以決圍外入可以屠城况小大異形強弱異勢
險易異備卑身以事強小國之形也以蠻夷伐蠻夷
中國之形也故陳湯統西域而郅支滅常惠用烏孫
而邊部寧且聚膽勇樂戰輕足之徒古稱良策請試
行之且邊鄙之人多負壯勇識外邦之情偽知山川
之形勝望於邊郡置營召募不須品度人才止求少
壯有武藝者萬人俟契丹有警令智勇將統而用之
必顯成功乃中國之長筭也又如權場之設蓋先朝
從權立制以惠契丹使其合盟亦不之廢似

大體今緣邊權場因其犯塞尋即停罷去歲以臣上
言於權州置場賣茶雖貨貨並行而邊氓未有所濟
之延訪大臣議其可否或文武中有抗執獨議是必
別有良謀請委之邊任使施方略責以成功苟空陳
浮議上惑聖聰祇如靈州足為證驗况茲契丹又非
夏州之比也四年十月建議選銳兵於乾寧軍挽刀
魚船自界河直趨平州境以牽西面之勢五年詔燕
領制置使田使始建權場或者謂承拒意在繼好然
契丹無厭未足誠信徒使公行窺伺會契丹有殺斥
候卒者復罷之時契丹數窺邊城大浚源頗撓其役

詔承矩握兵深入其境以分其勢承矩以無騎兵第
遣數千卒出混泥城襲之而還景德元年入朝進領
英州團練使真宗謂宰相曰承矩讀書好名以才能
自許宜擇善地處之冬出知澶州承矩自守邊以來
嘗欲朝廷懷柔遠人為息兵之計及是車駕按巡本
部卒與契丹和益加歎賞韓杞之至也命郊勞之明
年春復知雄州是歲契丹始遣使奉幣承矩以朝廷
待邊人之禮悠久可行者悉疏以聞手詔嘉納仍聽
事有未盡者便宜裁處三年真拜雄州團練使時邊
兵稍息農政未修又置緣邊安撫使命承矩為之五

詔邊民誘其復業承矩曰契丹聞之必謂誘其部屬
也乃易詔文為水旱流民之意王欽若時知樞密援
漢蟲達周仲居改詔請罪承矩帝曰承矩任邊有功
當優假之第詔自今朝旨未便者奏稟進止承矩頗
有識鑒與長沙日李沆王旦為佐承矩厚待之以為
有公輔器善推步自知真數乃以老疾求僻郡詔自
擇其代承矩以李允則為請乃授承矩齊州團練使
遣之任至郡裁七日卒年六十一特贈相州觀察使
賻錢五十萬絹五百匹中使護葬以其子龜齡為侍
禁日昌齡九齡為殿直遐齡為齋郎緣邊泊涿易州民

聞承矩卒皆相率詣雄州發哀飯僧昌齡娶齊王女
 太和縣主至內殿崇班昌齡子象中為閣門祗候
 李漢超雲州雲中人始事鄴帥范廷光不為所知又
 事鄆帥高行周亦不見親信會周世宗鎮澶淵漢超
 遂委質焉即位補殿前指揮使三遷殿前都虞候宋
 初改散指揮都指揮使領綿州刺史累遷控鶴左廂
 都校領恩州團練使從平李重進尋遷齊州防禦使
 兼關南兵馬都監漢超仕關南人有訟漢超強取其
 女為妾及貸而不償者太祖召而問之曰汝女可適
 何人曰農家也又問漢超未至關南契丹如何曰歲

苦侵暴曰今復爾耶曰否太祖曰漢超朕之貴臣也
 為其妾不猶愈於農婦乎使漢超不守關南尚能保
 汝家之所有乎責而遣之密諭漢超曰亟還其女并
 所貸朕姑貰汝勿復為也不足於用何不告朕耶
 漢超感泣誓以死報在郡十七年政平訟理吏民愛
 之詣闕求立碑頌德太祖詔率更令徐鉉撰文賜之
 霸州監軍馬仁瑀嘗兄事漢超多自肆擅發麾下卒
 入遼境剽奪人口羊馬由是二將交惡太祖慮其生
 變遣中使賜漢超仁瑀金帛令和解之太平興國初
 遷應州觀察使判齊州仍為關南巡檢二年八月卒

於屯所太宗甚悼惜贈太尉忠武軍節度中使護葬
漢超善撫士卒與之同甘苦死之日軍中皆流涕子
守恩

守恩少驍果善戰有父風初補齊州牙職開寶二年
太祖親征太原漢超為北面行營都監守恩從父軍
中會契丹遣兵援河東至定州西嘉山將入土門守
恩領牙兵數千騎戰敗之斬首三千級獲戰馬器甲
甚衆擒首領二十七人隨漢超見于行在賜戎服金
帶器幣緡錢太祖謂左右曰此稚子能若是他日將
帥才也漢超卒擢為驍猛軍校累官至隴州刺史知

靈州與轉運使陳緯部芻糧過瀚海為賊所邀守恩
及千廣文助教象之隴州衙內指揮使望之弟寄班
守忠皆沒真宗聞之震悼特贈守恩洪州觀察使次
子祐之順之用之潤之慶之成之藏之

郭進深州博野人少貧賤為鉅鹿富家傭保有膂力
倜儻任氣結豪俠嗜酒蒲博其家少年患之欲圖殺
進婦竺氏陰知其謀以告進遂走晉陽依漢祖漢祖
壯其材留帳下晉開運末契丹擾邊漢祖建號太原
契丹主道殂漢祖將入汴進請以奇兵間道先趨洛
州因定河北諸郡累遷乾坊二州刺史少帝即位改

磁州周廣順初移淄州二年吏民詣觀察使舉留是
秋遷登州刺史會群盜攻劫居民進率鎮兵平之部
內清肅民吏千餘人詣闕請立屏盜碑許之顯德初
移衛州衛趙邢洛間多亡命者以汲郡依山帶河易
為出沒伺間椎剽吏捕之輒遁去故累歲不能絕其
黨類進備知其情狀因設計發捕之數月間剪滅無
餘郡民又請立碑記其事改洛州團練使有善政郡
民復詣闕請立碑頌德詔左拾遺鄭起撰文賜之進
嘗於城四面植柳壕中種荷芰蒲葦後益繁茂郡民
見之有垂涕者曰此郭公所種也建隆初太祖親征

澤潞遷本州防禦使充西山巡檢嘗與曹彬王全斌
入太原境獲數千人開寶二年太祖親征河東以進
為行營前軍馬軍都指揮使九年命將征河東以進
為河東道忻代等州行營馬步軍都監招徠山後諸
州民三萬七千餘口太平興國初領雲州觀察使判
邢州仍兼西山巡檢賜京城道德坊第一區四年卓
駕將征太原先命進分兵控石嶺關為都部署以防
北邊契丹果犯關進大破之攻破西龍門砦俘馘來
獻自是并人喪氣時田欽祚護石嶺軍恣為姦利諸
不法事進雖力不能禁亦屢形於言進武人性剛烈

戰功高欽祚以他事侵之心不能甘自經死年五十八欽祚以暴卒聞太宗悼惜久之贈安國軍節度中使護葬後頗聞其事因罷欽祚內職出為房州團練使進有材幹輕財好施然性喜殺士卒小違令必寘於死居家御婢僕亦然進在西山太祖遣戍卒必諭之曰汝輩謹奉法我猶貸汝郭進殺汝矣其御下嚴毅若此然能以權道任人嘗有軍校自西山詣闕誣進者太祖詰知其情狀謂左右曰彼有過畏罰故誣進求免爾遣使送與進令殺之會并人入寇進謂誣者曰汝敢論我信有膽氣今捨汝罪能掩殺并寇即

薦汝於朝如敗可自投河東其人踴躍聽命果致克捷進即以聞乞遷其職太祖從之初開寶中太祖令有司造宅賜進悉用笏瓦有司言舊制非親王公主之第不可用帝怒曰進控扼西山十餘年使我無北顧憂我視進豈減兒女耶亟往督役無妄言太平興國初又賜宅一區

牛思進者祁州無極人少從軍以膂力聞嘗取強弓絀於耳以手引之令滿又負墻立力士二人撮其乳曳之疑不動軍中咸異之太平興國四年知平定軍從征河東石嶺關部署郭進卒命思進代之師還以

三百九十五
功改本州團練使七年授右千牛衛上將軍致仕卒
李謙溥字德明并州孟人性慷慨重然諾父堯後唐
清泰中晉祖鎮并門署為參謀人福初為開封府推
官使契丹還上言屈節外國非人長策時晉祖方父
事契丹不悅其言出為汝州魯山令卒官謙溥少通
左氏春秋從晉祖入汴補殿直奉使契丹少帝即位
改西頭供奉官漢初遷東頭周祖討三叛及守鄴都
謙溥往來宣密命周祖愛之廣順初遷供備庫副使
世宗征劉崇遼州刺史張乙堅壁不下遣謙溥單騎
說之乙以城降以功改閑廐使師還留為晉州兵馬

都監以偏師入河東境頻致克捷世宗詔優之會隰
州刺史孫義卒時世宗親征淮南謙溥謂節帥楊廷
璋曰大寧咽喉要地不可闕守且車駕出征若俟報
則孤城陷矣廷璋即署謙溥權隰州事至郡亟命浚
城隍嚴兵備凡八日并人果以數千騎來寇時盛暑
謙溥單衣持扇從二小吏登城徐步按視戰具并人
退舍後旬餘大發衝車攻城謙溥募敢死士得百餘
人短兵堅甲銜枚夜縋出城會廷璋兵至合勢夾攻
掩其不及并人大擾悉眾遁去追北數十里斬首千
餘級時顯德四年也明年五月攻破孝義縣以功領

衢州刺史監軍如故世宗北征召赴行在恭帝即位
 為澶州巡檢使詔城莫州數旬而就改丹州刺史建
 隆四年移慈州兼晉隰緣邊都巡檢行石州事以興
 同若為治所冬將有事于南郊太祖命四路進兵略
 地太原鄭州刺史孫延進絳州刺史沈繼深通事舍
 人王睿等師出陰地以謙溥為先鋒會霍邑謙溥因
 畫攻取之策繼深等共沮之延進不能用軍還出白
 壁關次谷口謙溥語諸將曰王師深入敵境今既退
 軍彼必乘我諸君當備之諸將不答謙溥獨令所部
 環甲伐追騎果至延進等倉皇走谷中獨謙溥麾兵

拒之并人引退未幾移隰州刺史開寶元年命李繼
 勳等征太原以謙溥為汾州路都監太祖征晉陽為
 東砦都監前軍副部署党進遣謙溥伐木西山以給
 軍用未至聞鼓聲乃并人逼西砦大將趙贊禦之并
 眾未退謙溥麾所部赴之太祖遽至觀戰怪其赴援
 者非精甲問之乃謙溥也帝甚喜謙溥在州十年敵
 人不敢犯境有招收將劉進者勇力絕人謙溥撫之
 厚藉其死力徃來境上以少擊眾并人患之為蠟丸
 書以間進佯遺書道中晉帥趙贊得之以聞太祖令
 械進送闕下謙溥詰其事進伏請死謙溥曰我以舉

四十一
宗四十口保汝矣即上言進為并人所惡此乃反間也奏至帝悟遽令釋之賜以禁軍都校戎帳服具進感激願擊敵自効開寶三年召謙溥為濟州團練使後邊將失律復為晉隰緣邊巡檢使邊民聞之喜爭相迎勞於道左六年領兵入太原連拔七砦八年以疾求歸有輿抵洛太祖遣中使領太醫就視之至京師疾篤累上章辭祿不許明年春卒年六十二太祖甚痛惜之賻贈有加葬事官給謙溥與宣祖同里閭弟謙昇與太祖為布衣交其母閭嘗厚待太祖及即位數迎入官中使左右掖之不令拜命坐飲食話及

舊故賜賚優厚雍熙中太宗為許王納謙昇女為夫人以謙昇為如京副使謙溥子允則允正允則至寧州防禦使從子允恭為內殿崇班閤門祇候

允正字脩己以蔭補供奉官太平興國中掌左藏庫屢得升殿奏事太宗頗記憶其舊故雍熙中與張平同掌三班俄為閤門祇候四年遷閤門通事舍人時女弟適許王以居第質于宋偓太宗詰之曰爾父守邊二十餘年止有此第耳何以質之允正具以奏即遣內侍輦錢贖還摺紳咸賦詩頌美淳化中命討戎瀘州叛蠻遷西上閤門副使太宗慮京城獄囚淹繫

命允則提總之嘗請詔御史臺給開封府司錄司左
 右軍巡四排岸司印紙作囚簿署禁繫月日條其罪
 犯歲滿較其殿最詔從其請踰年開封府上言京師
 浩穰禁繫尤衆御史府考較之際胥吏奔命有妨推
 鞠况無欺隱不煩推校卒罷之允正又提點左右藏
 屢乘傳北面經度邊要五年為衛州修河部署會建
 清遠軍積石砦命詣瀚海部分其役還拜西上閤門
 使并州駐泊鈐轄俄代張永德知州事徙代州咸平
 初使西蜀詢訪民事還進秩東上閤門使歷知鎮莫
 二州又為并代馬步軍鈐轄契丹擾邊車駕駐大名

允正與高瓊率太原軍出土門攻來會召見便殿所
 部有廣銳騎士數百皆素練習命允正引以入賜緡
 錢遣屯邢州與石保吉逐遼人遼人遁去俄以兵會
 大名復還并代五年合涇原儀渭邠寧環慶路為一
 界命王漢忠為都部署驛召允正為鈐轄兼安撫都
 監即日上道又命與錢若水同請洪德懷安沿邊諸
 砦經度邊事加領誠州刺史七月罷兩路之職復任
 并代鈐轄每錢若水按巡邊壘即詔權涖州事進四
 方館使代馬知節為廊延部署兼知延州改客省使
 知定州兼鎮定都鈐轄大中祥符三年累表求還至

京師將祀汾陰以疾難於扈從命為河陽部署以便
養會張崇貴卒趙德明頗踰軼亟詔徙允正為廊延
部署內侍密詔存諭禮成領河州團練使允正頗知
書性嚴毅踈財喜自修飭素病痾痿以是罕在要近
累典邊任多殺戮是秋徙中丞與軍卒年五十一
姚內斌平州盧龍人仕契平為關西巡檢瓦橋關使
周顯德六年太祖從世宗北征兵次瓦橋關內斌率
眾五百人以城降世宗以為汝州刺史吏民詣關舉
留恭帝詔褒之內斌本名犯宣祖諱下一字遂改人
名從平李筠攻魏州刺史西夏數犯西鄙以內斌

慶州刺史燕青白兩池擁鹽制置使在郡十數年西
夏畏伏不敢犯塞魏內斌為姚大蟲言其武猛也初
內斌降其妻子皆在契丹乾德四年子承贊密自幽
州來歸五年幽州民田光嗣等又以內斌兒女六人
間道來歸太祖並召見賜以衣服緡錢鞍馬令中使
護送還內斌開寶四年召赴闕上待之甚厚遣歸治
所七年春暴得疾卒年六十四遣中使護喪歸葬洛
陽常賻外賜其子田三十頃承贊為供奉官閤門祗
候死于陣承鑒至殿中丞

董遵誨涿州范陽人父宗本善騎射隸契丹帥趙延

壽麾下嘗以事說延壽不能用及延壽被執舉族南奔漢祖得之擢拜隨州刺史署遵誨隨州牙校周顯德初世宗北征大將高懷德遵誨之舅也表遵誨從行師次高平與晉人遇將接戰晉兵未成列懷德命遵誨先出奇兵擊之晉人潰大軍繼進遂敗之二年討秦鳳大將韓通又表遵誨自隨與賊戰于唐金亮登陷陣擒蜀招討使王鸞以獻克秦鳳二州師還錄其前後功補東西班押班又遷驍武指揮使四年從世宗征淮南攻合肥下之六年從韓通平雄霸二州太祖微時客遊至漢東依宗本而遵誨憑藉父勢太

祖每避之遵誨嘗謂太祖曰每見城上紫雲如蓋又

夢登高臺遇黑蛇約長百尺餘俄化龍

騰東北去

雷電隨之是何祥也太祖皆不對他日論兵戰事遵

誨理多屈拂衣而起太祖迺辭宗本去自是紫雲漸

散及即位一日便殿召見遵誨於地請死帝令左右

扶起因諭之曰卿尚記往日紫雲及龍化之夢乎遵

誨再拜呼萬歲俄而部下有軍卒擊登聞鼓訴其不

法十餘事太祖釋不問遵誨益惶愧待罪太祖召而

諭之曰朕方赦過賞功豈念舊惡耶汝可勿復憂吾

將錄用汝遵誨再拜感泣又問遵誨母安在遵誨奏

曰母氏在幽州經患難朕隔太祖因令人賂邊民竊
 迎其母送與遵誨遵誨遣外弟劉綜貢馬以謝太祖
 解其所服真珠盤龍衣命齎賜之綜曰遵誨人臣豈
 敢當此太祖曰吾方委以方面不此嫌也會李筠叛
 澤潞令遵誨從慕容延釗討之遷馬軍都軍頭因留
 之鎮守三年召歸再遷為散員都虞候乾德六年以
 西夏近邊授通遠軍使遵誨既至召諸族酋長諭以
 朝廷威德割羊醜酒宴犒甚至衆皆悅服後數月復
 來擾邊遵誨率兵深入其境擊走之俘斬甚衆獲羊
 馬數萬夷落以定太祖嘉其功就拜羅州刺史如故

太宗即位兼領靈州路巡檢遵誨不知書豁達無崖
 岸多方略能挽強命中武藝皆絕人在通遠軍九十
 四年安撫一面夏人悅服嘗有剽略靈武進奉使鞍
 馬兵器者遵誨部署帳下欲討之夏人懼盡歸所略
 拜伏請罪遵誨即慰撫令去自是各謹封略秋毫不
 敢犯歷太祖太宗朝委遇始終不替許以便宜制軍
 事太平興國六年卒年五十六帝軫悼久之遣中使
 護葬賜賻加等錄其子嗣宗嗣榮為殿直
 賀惟忠忻州定襄人少勇敢善騎射周祖將兵討三
 叛惟忠謁於道左自陳其有武藝周祖悅之即留置

三子八十九
所部洎開國得隸世宗帳下奏補供奉官不辭輒入
朝世宗怒之及嗣位終不遷擢初授儀鸞副使令知
易州捍邊有功尋遷正使開寶二年太祖駐常山以
惟忠為本州刺史兼易定祁等州都巡檢使嘗中流
矢六年金瘡發而卒太祖聞之嗟悼即以其子昭度
為供奉官惟忠性剛果知書洞曉兵法有方略在易
州繕完亭障撫士卒得其死力每與塞用兵所向必
克威名震北邊故十餘年間契丹不敢南牧昭度至
西京作坊使淳化中知通遠軍有罪當棄市減死流
商州

馬仁瑀大名夏津人十餘歲時其父令就學輒逃歸
又遣於鄉校習孝經旬餘不識一字博士笞之仁瑀
夜中獨往焚學堂博士僅以身免常集里中群兒數
十人與之戲為行陣之狀自稱將軍日與之約鞭其
後期者群兒皆畏伏又市果均給之益相親附及長
善射挽弓二百斤漢乾祐中周祖鎮鄴仁瑀年十六
願隸帳下周祖素聞其勇既見甚喜留置左右廣順
初補內殿直世宗嗣位命衛士習射苑中仁瑀弓力
最勁而所發多中賜錦袍銀帶會太原劉崇入寇世
宗親征至高平周師不利諸將多引退仁瑀謂衆曰

主辱臣死安用我輩乃控弦躍馬挺身出陣射賊斃者數十人工氣益振大軍乘之崇遂敗績世宗至上黨諸將坐失律誅者七十餘人擢仁瑀為弓箭控鶴直指揮使及還京又遷散指揮使從征淮南至楚州攻水砦砦中建飛樓高百尺餘世宗觀之相去殆二百步樓上望卒厲聲嫚罵世宗怒甚命左右射之遠莫能及仁瑀引滿應弦而顛及淮南平身被數十創賜以良藥遷內殿直都虞候又從平三關恭帝嗣位詔從太祖北伐初以佐命功授散員都指揮使領貴州刺史俄遷鐵騎右廂都指揮使又為虎捷左廂都

指揮使領扶州團練使從平澤潞以功領常州防禦使改龍捷左廂都指揮使建隆二年改領岳州防禦使俄又移領漢州初詔仁瑀等領荆湖諸郡不數歲復其地至是將征蜀又詔領川峽諸郡遂平之先是薛居正知貢舉仁瑀私囑所與者榜出無其人聞喜宴日仁瑀酒酣攜所囑者詣居正切責之為御史中丞劉溫叟所劾帝優容之王繼勳以后族驕恣凌蔑將帥人皆引避獨仁瑀詞氣不相下嘗攘臂欲歐之會帝將講武郊外遂欲相圖各勒所部兵私市白挺太祖密知之詔罷講武出仁瑀為密州防禦使太祖

征晉陽命仁瑀率師巡邊至上谷漁陽契丹素聞仁瑀名不敢出因縱兵大掠俘生口牛羊數萬計駕還仁瑀歸治所明年群盜起兗州賊首周弼毛襲甚勇悍材貌奇偉弼號曰長脚龍監軍討捕數不利詔仁瑀掩擊仁瑀率帳下十餘卒入泰山擒弼盡獲其黨魯郊遂寧閣寶四年遷瀛州防禦使兄子嘗因醉誤殺平民繫獄當死民家自言非有宿憾但過誤爾願以過失殺傷論仁瑀曰我為長吏而兄子殺人此怙勢爾非過失也豈敢以私親而亂國法哉遂論如律給民家布帛為棺斂具太平興國初移知遼州四

車駕征太原命仁瑀與成州刺史慕容超飛龍使白重貴八作使李繼昇分兵攻城及征范陽命仁瑀率禁兵擊契丹於盧龍北契丹兵奔潰師還遷朔州觀察使判瀛州事七年卒年五十贈河西軍節度葬事官給

論曰宋初交廣劔南太原各稱大號荆湖江表止通貢奉契丹相抗西夏未服太祖常注意於謀帥命李漢超屯關西馬仁瑀守瀛州韓令坤領常州賀惟忠守易州何繼勳領棣州以拒北敵又以郭進控西山武守琪戍晉州李謙溥守隰州李繼勳鎮昭義以禦

字三百九十九
卷三十三

太原趙贊屯延州姚內斌守慶州董遵誨屯環州王
彥昇守原州馮繼業鎮靈武以備西夏其族在京師
者撫之甚厚郡中筦推之利悉以與之恣其貿易免
其所過征稅許其召募亡命以為爪牙凡軍中事皆
得便宜每來朝必召對命坐厚為飲食錫賚以遣之
由是邊臣富貴能養死士使為間諜洞知敵情及其
入侵設伏掩擊多致克捷二十年間無西北之憂以
至命將出師平西蜀拓湖湘下嶺表克江南所向遂
志蓋能推赤心以馭群下之所致也若李進卿楊美
專師西征而美居北海以樂易結民心誠得為改
之本延渥承矩守恩允正皆紹先業以勲名著承矩
議屯田贊和好其謀甚遠守恩以果敢死事宋之武
功於斯為盛焉

列傳卷第三十二

宋史二百七十三
唐

字六十一人
身及列傳卷三十三
王祖

列傳卷第三十三

開府儀同三司上柱國錄軍國事兼前書右丞相攝國史領經筵事都總裁長脫等奉

勅修

王贊 張保續 趙玘 盧懷忠

王繼勳 丁德裕 張延通 梁迴

史珪 田欽祚 侯贊 王文寶

翟守素 王侁 劉審瓊

王贊澶州觀城人少為小吏累遷本州馬步軍都虞候周世宗鎮澶淵每旬決囚贊引律令辨析中理問之知其嘗事學問即署右職及即位補東頭供奉官

宋史二百七十四

湯惠官

字三百四十四
累遷右驍衛將軍三司副使時張美為使世宗問京
城衛兵歲廩幾何美不能對替代奏甚悉美因是銜
之及征關南言於世宗以替為客省使領河北諸州
計度使五代以來姑息藩鎮有司不敢繩以法替所
至發擿姦伏無所畏忌振舉綱領號為稱職由是邊
臣切齒師還復為三司副使建隆初始平李重進太
祖素知替材幹可委以完葺即令知揚州既行舟覆
於閭橋下溺死親屬隨沒者三人上甚嗟悼謂左右
曰溺吾樞密使矣蓋將大用也賻其家絹三百匹米
粟各二百斛

張保續字嗣光京兆萬年人父洪唐左武衛上將軍
保續以蔭補太廟齋郎梁貞明中調補臨濟尉選充
四方館通事舍人後唐天成初領瓜州官告國信副
使郊祀改右贊善大夫晉天福中歷太府光祿二少
卿職同正領通事舍人開運二年契丹入寇杜重威
李守貞符彥姁等率兵禦之命保續馳騎往來軍中
諭機事既而大破敵於陽城使還以本官充西上閤
門副使明年使荆南復命轉東上閤門副使契丹犯
闕被驅北徙留范陽歲餘逃歸漢乾祐初出為龐州
防禦使周祖革命召為東上閤門副使從平慕容彥

超累遷引進副使知閤門事世宗即位授西上閤門使明年進秩東上閤門使從之仕淮南會壽州納款遣保續先往慰撫及劉仁贍率將卒出降以功遷判四方館事就遷客省使從平瓦橋關奉使吳越宋初遷衛尉卿判四方館客省閤門事保續性介直好儉素在閤門前後四十年善宣贊辭令聽者傾聳累使藩國不辱命歷事六朝未嘗有過從征李筠以足疾留河內後歸京師建隆三年卒年六十四

趙玘澶州人家富於財晉天福中以納粟助邊用補集賢小史調濮州司戶叅軍刺史白重進以其年

欲試以事因以滯獄授之玘為平決志自中理重進移刺號成二州連辟為從事會契丹構難秦帥何重建獻地於蜀孟知祥署高彥傳秦州節度成為支郡因署玘秦成階等州觀察判官周顯德初命王景帥兵討秦鳳彥傳出兵救援未至聞軍敗因潰歸玘閉門不納召官屬諭之曰今中朝兵甲無敵於天下自用師西征戰無不勝蜀中所遣將皆武勇者卒皆驍銳者然殺戮遁逃之外幾無孑遺我輩安忍坐受其禍去危就安當在今日衆皆俯伏聽命玘遂以城歸朝世宗欲命以藩鎮宰相范質不可乃授郢州刺史

歷汝密澤三州刺史建隆中入為宗正卿乾德初出
為秦州刺史二年改左監門衛大將軍判三司玘狂
躁婢直多忤上旨太祖頗優容之嘗廉得宰相趙普
私市秦隴大木事潛以奏白然懼普知因稱足疾求
解職五年春罷使守本官自是累獻密疏皆留中不
出常疑普中傷六年請闕納所授告命詔勒歸私第
又請退居鄆州不許玘不勝忿踰年伺普入朝馬前
揚言其短上聞之召玘及普於便殿面質其事玘大
言詆普販木規利上怒促令集百官遂普且諭其事
王溥等奏玘誣罔大臣普事得解上詰責玘命貳

擿之令御史鞫於殿庭普為營救得實其罰黜為汝
州牙校太平興國三年卒年五十八

盧懷忠瀛州河間人少有膂力善騎射漢乾祐初寓
居河中值李守貞之叛周祖圍其城懷忠夜踰城出
見陳攻取便宜河中平奏補供奉官從征慕容彥超
於兗州顯德初監沂州軍以所部破海州功居多世
宗議北征先遣懷忠按視出師道路三關平遷如京
副使宋初遷內酒坊副使會郎州軍亂太祖將出師
致討遣懷忠使荆南因謂曰江陵人情去就山川向
背我欲盡知之懷忠使還奏曰繼冲甲兵雖整而控

四百字
茲不過三萬年穀雖登而民苦暴斂南邇長沙東距
金陵西迫巴蜀北奉朝廷觀其形勢蓋日不暇給矣
太祖召宰相范質等謂曰江陵四分五裂之國今出
師湖南假道荆渚因而下之萬全策也即以懷忠為
前軍步軍都監荆湖平以功遷內酒坊使乾德二年
改判四方館事知江陵府四年上師伐蜀江陵當峽
江會衝以供億之勞遷客省使又明年使江南還中
途遇疾有輿歸京師太祖遣醫在艾以賜之未幾卒
年四十九大中祥符四年錄其子熈為校書郎
王繼勳陝州平陸人隸河中府為牙校李守貞之叛

令繼勳據潼關為郭從義所破走還河中俄白文珂
劉訥領兵至城下守貞又遣繼勳與其愛將聶知遇
夜出攻河西砦復為漢兵所敗被劊而遁繼勳度守
貞必敗遂踰城出降周祖奏補供奉官廣順初領汾
州刺史充晉磁隰等州緣邊巡檢歷憲麟石磁四州
刺史宋初遷磁州團練使坐境上用兵失律荆罕儒
陷陣責授右監門衛率初平荆襄命權知道州未幾
授本州刺史州境與廣南接劉鋹屢引兵入寇繼勳
因上言嶺表可圖之狀及王師南伐以為賀州道行
營馬步軍都監繼勳有武勇在軍陣常用鐵鞭鐵槊

三百九十字
鐵搗軍中目為王三鐵

丁德裕洛州臨洛人父審琦彰武軍節度周廣順初以蔭補供奉官宋初歷通事舍人西上閣門副使建隆三年遷東上閣門使從慕容延釗平荆湖以功授引進使又與潘美尹崇珂克郴州遷客省使乾德五年遷內客省使時成都初平群寇起用為西川都巡檢使與閣門副使張延通同率師討之擒賊帥康祚礫於市歲餘盡平其黨頗與延通不協歸朝告其陰事延通坐棄市又奏轉運使禮部郎中李鉉嘗醉酒言涉指斥上怒驛召鉉下御史案之鉉言德裕

蜀日屢以事請求多拒之

狀御

聞太祖悟

止坐鉉酒失責授左贊善大夫未幾德裕亦出知潞州會征江南遣德裕為常州行營兵馬都監領兵越兵助主帥進討常州平命權知州事又改昇州東南路行營都監敗潤州軍五千餘於城下及拔潤州移鎮常潤等州經略巡檢使德裕以傾險為眾所惡恃勢剛狠不恤士卒黷貨無厭越人苦之錢俶奏其事與房州刺史卒

張延通潞州潞城人父彥成周右金吾衛上將軍延通性穎悟有才幹蔭補供奉官宋初歷通事舍人遷

東上閣門副使開寶中為西川兵馬都監太祖以蜀
寇未平命同內客省使丁德裕引進副使王班內臣
張嶼領兵屯蜀部德裕頗專恣延通面質其短德裕
銜之又與張嶼不協延通亦為和斛之德裕疑延通
與嶼為黨益不悅會太祖征太原有使自行在至備
言太祖當盛夏躬冒大石勞頓萬狀延通曰主上勤
勞若此而吾輩日享安樂蓋言不自安也德裕不答
會張嶼先歸闕太祖賜予甚厚延通德裕繼至則召
延通顧問而待德裕稍薄德裕頗疑懼遂奏延通嘗
對眾言涉指斥且多不法事指嶼為黨太祖怒即

延通張嶼及王班下御史臺鞫之延通等引伏太祖
始欲捨之及引問延通抗對不遜遂斬之嶼班并內
臣王仁吉並杖脊嶼配流沙門島班許州仁吉西塞
務時開寶二年也

梁迴博州聊城人少為吏部小史周世宗在藩邸日
得給事左右及嗣位補殿直改供奉官四遷至左藏
庫使太祖將討西蜀以迴監秦州戍兵蜀平改監霸
州兵轉宮苑使從征太原還會命蜀州刺史聶章為
沁州兵馬部署以迴監其軍無何并人入寇迴與閻
彥進同率兵擊敗之以功遷東上閣門使開寶五年

命為廣南道兵馬都監兼諸州巡檢八年奉使江南
迴素貪冒外務矯飾初若嚴毅不可犯雖饋食亦不
受江南人頗憚之既而奉以貨貨始直數萬緡迴即
大喜過望登舟縱酒繼日宴樂及歸戀戀不發人多
笑之暨王師伐金陵命迴與潘美劉遇率步兵先赴
荆南且以迴護行營步兵及左廂戰擢與吳人戰采
石殺獲甚衆江南平以功領順州團練使太宗即位
判四方館事領禁軍戍澤州太平興國三年錢俶來
朝命往淮泗迎勞夏汴水大決詔迴發畿內丁男三
千護塞汴口四年征太原以迴為行營前軍馬步軍

都監督軍攻城中流矢四車駕還命與孟玄喆崔翰
率兵屯定州以功遷引進使五年受詔與潘美城并
州於三交及築緣邊保障七年李繼遷寇邊以迴領
兵護銀夏州八年召歸授唐州防禦使令赴職雍熙
二年繼遷誘殺都巡檢使曹光實乘執數寇邊復召
迴為銀夏都巡檢使赴邊捍禦之三年夏卒於銀州
官舍年五十九迴性麤率尤不喜文士故事節帥出
鎮及來朝便殿宴勞翰林學士皆預坐開寶中迴為
閣門使白太祖曰陛下宴犒將帥安用此輩預坐自
是罷之至淳化中翰林學士蘇易簡白於太宗始復

預焉大中祥符八年錄迴子廷翰為奉職

史珪河南洛陽人父暉晉嚴衛指揮使珪少以武勇

隸軍籍周顯德中遷小校太祖領禁衛以珪給事左

右及受禪用為御馬直隊長四遷馬步軍副都軍頭

兼控鶴弓弩大劔都指揮使開寶六年加都軍頭領

毅州刺史太祖初臨御欲周知外事令珪博訪珪廉

得數事白於上驗之皆實由是信之後乃漸肆威福

民有市官物不當價者珪告其欺罔當實法列肆無

不側目上聞之因下詔曰古人以獄市為寄者蓋知

小民唯利是從不可盡法而繩之也况先甲之令

嘗申明苟陷人於刑深非理道將禁其二價宜示以

明文自今應市易官物有妄增價直欺罔官錢者案

鞫得實並以枉法論其犯在詔前者一切不問自是

珪不復敢言時德州刺史郭貴知邢州國子監丞梁

夢昇知德州貴族人親吏之在德州者頗為姦利夢

昇以法繩之貴素與珪善遣人以其事告珪圖去夢

昇珪悉記於紙將伺便言之一日上因言爾來中外

所任皆得其人珪遽曰今之文臣亦未必皆善乃探

懷中所記以進曰祇如知德州梁夢昇欺蔑刺史郭

貴幾至於死上曰此必刺史所為不法夢昇真清強

吏也因以所記紙付中書曰即以夢昇為贊善大夫
 既又曰與左贊善珪以譖不行居常快快九年坐漏
 洩禁中語出為光州刺史會歲饑淮蔡民流入州境
 珪不待聞即開倉減價以糶所全活甚衆吏民詣闕
 請植碑頌德者數百人太平興國初以為揚楚等九
 州都巡檢使四年征太原命珪與彰信軍節度劉遇
 攻城北面從征幽州坐所部逗撓失律責授定武行
 軍司馬數月召為右衛將軍領平州刺史督浚惠民
 河自尉氏達京九十里數旬而畢民咸便之會江淮
 氏麴謀首等數十百人聚為盜命珪率龍猛騎兵而

百姓捕悉獲之六年遷隰州刺史知保州靜戎軍上
 緣邊便宜十五事皆從之雍熙中從曹彬征幽州為
 押陣部署以所部下涿州師還卒年六十一珪多智
 數好以甘言小惠取譽於人故所至不忍其去云
 田欽祚穎州汝陰人父令方漢號州團練使帳下伶
 人靖邊庭妻有美色令方私之邊庭不勝忿會陝西
 三叛連衡關輔間人情大擾邊庭率其徒數人夜縋
 入州解害令方因掠郡民投趙思綰至潼關與守關
 使者戰遂敗散朝廷錄欽祚為殿直改供奉官周世
 宗征淮南為前軍都監從征關南還會塞澶淵決河

命欽祚領禁兵護役因令督治澶州城准人寇高密
刺史王萬威求濟師命欽祚領州兵援之既至圍解
宋初遷閣門通事合人乾德二年冬討蜀為北路先
鋒都監令乘傳往來宣達機事孟昶降奉捷書馳奏
遷西上閣門副使蜀土寇亂又遣欽祚率師討平之
四年春并人寇樂平從羅彥瓌拒之獨以所部三千
人破寇擒副將一人俘獲甚衆以功遷西上閣門使
開寶二年又與何繼筠破賊兵于石嶺關領賀州刺
史判四方館使三年契丹寇中山以欽祚為定州路
兵馬都部署與戰遂城自旦及晡殺傷甚衆欽祚馬

中流矢踣騎士王超授欽祚以馬軍復振敵解去朝
廷將議討江表遣欽祚覘之還奏合旨江南所得寶
貨直三千萬悉以賜欽祚會興師首命欽祚與曹彬
李漢瓊率騎軍先赴江陵就命為昇州西南路行營
馬軍兼左廂戰權都監領兵敗吳軍萬餘于溧水斬
其主帥李雄等五人擒裨將二人進圍金陵為南面
攻城部署既平以功加領汾州防禦使太平興國初
遷引進使為晉州都鈐轄太原驍將楊業率衆寇洪
洞縣欽祚擊敗之斬首千餘級獲馬數百太宗賜欽
祚白金五千兩令布宅四年從征太原護前鋒騎兵

四百八十八
屯石嶺關以打契丹欽祚性剛戾負氣多所忤犯與
主帥郭進不協進戰功高屢為欽祚所陵心不能甘
遂自縊死初賊兵奄至進出戰欽祚但閉壁自守既
去又不追所受月奉芻粟多販鬻規利為部下所訴
責授睦州團練使車駕北巡以為幽州西路行營壕
砦都監六年秋改房州團練使逾年又改柳州嶺外
多瘴氣因遘疾累表乞生還闕下上憐之遷郢州團
練使在郡二年入覲欽祚見上涕泣不已以為銀夏
綏宥都巡檢使俄召還會征幽州命欽祚與宣徽南
院使郭守文為排陣使時欽祚已被病受詔入謁

使
一夕卒欽祚性陰狡尤不喜儒士好狎侮同列人多
惡之子承誨仕至供奉官閤門祗候承說至崇儀副

侯贊并州太原人父義漢遼州刺史贊以陰補殿前
承旨周顯德中再遷至供奉官江南復命領三門集
津發運事宋初為諸衛將軍先是朝廷歲仰關中穀
麥以給用贊掌其事歷三十年國用無闕累遷至右
武衛將軍開寶中歷知建安軍揚徐二州皆有善政
太宗即位移知福州改右衛將軍太平興國二年錢
俶初納土詔贊馳往兩浙諸州閱視軍儲芻芡累遷

右衛大將軍七年知靈州按視蕃落宴犒以時得邊士心部內大治遷左衛在朔方凡十餘年上念久次求可代者而難其人淳化二年卒于官年七十四贈本衛上將軍

王文寶開封陽武人以任子補殿直太平興國初累遷至軍器庫使嘗使契丹會陳洪進獻漳泉地以文寶監泉州兵群盜大起文寶與轉運使楊克讓知州喬惟岳共討平之以功領媯州刺史加內弓箭庫使二年京西轉運使程能議開新河自襄漢至京師引白河水注焉以通湘潭之漕詔發唐鄧汝穎許蔡

鄭丁夫數萬赴其役發諸州兵萬人助之命文寶與六宅使李繼隆作坊副使李仁祐劉承珪分往護作既而地高水下不能通卒堙廢焉雍熙四年改東上閣門使歷知涇延二州會遼人寇通遠軍命文寶率師致討還遷判四方館事文寶歷兩職三十年雅好言外事太祖太宗頗信任之中外咸畏其口出為高陽關兵馬鈐轄淳化二年卒于官

翟守素濟州任城人父溥晉左司禦率府率守素以父任為殿直歷漢周遷供奉官領承天軍使乾德中為引進副使從王全斌伐蜀以往來馳告軍事為職

蜀平擢判四方館以兩川餘寇未殄慮致騷動再令守素入蜀經略諸郡分兵以防遏之開寶中會麟府內屬戎人爭地不決因致擾亂命守素馳往撫喻守素辨其曲直戎人悅服從征太原命海州刺史孫方進圍汾州守素監其軍轉引進使開寶三年命為劍南十州都巡檢使東上閣門使郭崇信副之賜守素錢五百萬人謝日復遣為岐帥符彥卿官告使守素辭以錫賚優厚不敢更當奉使之詔上不許九年吳越國王錢俶來朝命守素護諸司供帳迎勞郊外并壘未下詔與洛州防禦使郭進率兵深入其境蹈藉

禾稼守素多所虜獲太宗即位遷客省使領憲州刺史太平興國三年夏河決滎陽詔守素發鄭之丁夫千五百人與卒千人領護塞之是秋梅山洞蠻恃險叛命詔遣守素率諸州屯兵往擊之值霖雨彌旬弓弩解弛不堪用明日將接戰守素一夕令削木為弩及旦賊屯至交射之賊遂敗乘勝逐北盡平其巢穴先是數郡大吏富人多與賊帥包漢陽交通既而得其書訊數百封守素並焚之反側以定俄而錢俶獻浙右之地詔守素為兩浙諸州兵馬都監安撫諸郡人心甚悅即以知杭州歲滿為西京巡檢使秦王廷

美以事勒歸私第以守素權知河南府兼留守司事屬洛陽歲旱艱食多盜上憂之守素既至漸以寧息未幾遷商州團練使雍熙二年改知延州自劉廷讓敗于君子館河朔諸州城壘多圯四年詔守素與田仁朗王繼恩郭延濬分路案行發諸州鎮兵增築護其役賜白金三十兩留充天雄軍兵馬鈐轄知大名府改知潞州會建方田命為代北方田都部署并州兵馬鈐轄從屯夏州改知鳳翔府淳化中夏帥趙保忠上言其弟繼遷誘戎人為寇且求援師詔守素率兵復屯夏州未幾又徙石州以老病上疏求歸本郡

從之三年卒年七十一守素逮事四朝繇歷內職五十餘年性謹慎寬仁容衆所至有治績凡斷大辟獄雖罪狀明白仍徧詢僚案僉同而後決屬吏有過不面折必因公宴接往事之相類者言其獲咎以微警之新進後生多至筇帥而守素又次不遷殊無愾獲意特論以此多之

王侁字祕權開封浚儀人父朴周樞密使侁以父任太僕寺丞朴卒世宗幸其第召見諸孤以侁為東頭供奉官開寶中征江南命侁率師戍桐城王師渡江與樊若水同知池州領兵敗江南軍四千餘于宣州

金陵平加閣門祗候太平興國初預討梅山洞蠻契丹使來朝詔侁送于境上還使靈州通遠軍及旋言主帥所留牙兵率與邊人交結頗桀黠難制歲久當慮請悉代之太宗因遣侁調內郡卒往代之成者聞代多不願還侁察其中旅拒者斬之以徇衆皆悚息遂將以還一歲中數往來西邊多奏便宜上多聽用遷通事舍人四年從征太原以侁護陽曲塌地石嶺關諸屯賜廐馬介冑五月即城下轉東上閣門副使晉陽平留為嵐憲巡檢九年代還遷西上閣門使賜錢百萬河西三族首領折遇也叛入李繼遷侁帥師

討擒之以功領蔚州刺史王師北征命為并州駐泊都監又為雲應等州六馬都監侁性剛愎以語激揚業業因力戰陷於陣侁坐除名配隸金州事載楊業傳會赦移均州團練副使淳化五年召還道病至京師卒弟僕供奉官閣門祗候坐征交趾軍敗誅備偃並進士及第偃至太常博士朴弟格宋初為右補闕直史館至都官員外郎廣南轉運使格子侗太平興國進士至都官員外郎

劉審瓊涿州范陽人家素貧漢乾祐中湘陰公鎮彭門審瓊始隸帳下周祖受命遁去依永興軍節度劉

詞頗委任之詞卒屬太祖節鎮給事左右及受禪補殿直從平澤潞改供奉官開寶中累遷至軍器庫使會樞密使李崇矩門人鄭伸擊登聞鼓誣告崇矩受太原席義叟黃金私結翰林學士扈蒙以甲科私義叟引審瓊為證上怒召審瓊詰問審瓊具言其誣枉得解遂出知鎮州七年太宗征河東駐蹕月餘儲待無闕遷領檀州刺史知潭州州素多火日調民積水為防民甚勞之審瓊至悉罷之以為民便徙知河陽淳化三年受代歸陳衰老乞正受郡符上閱其舊人授坊州刺史至道三年卒于官審瓊嘗給事外諸侯

雅善酒令博勸年八十餘筋力不衰鬚髮鬢黑孫爽進士及第後為祠部員外郎祕閣校理

論曰王贊奮迹小校有奉公之節繩姦列郡不畏強禦保績單車出使不辱君命懷忠識荊渚之將危繼勲知番禺之可取侯贊久治邊郡文實數護屯兵斯各一時之效也德裕梁迴欽祚王侁皆練習戎旅頗著勲勞然率疆戾而乏溫克以速於戾斯乃明哲之所戒玳以剛險蒙悔吝珪以發擿肆威福其不逞者歟守素不躁競審瓊克享期頤易曰視履考祥其旋元吉此之謂也

列傳卷第三十三

列傳卷第三十四

宋史二百七十五

開府儀同三司上柱國魯國公事節書右丞相魯國公領經筵事都總裁脫等奉

勅修

劉福

安守忠

孔守正

譚延美

元達

常思德

尹繼倫

薛超

丁罕

郭密

傅思讓
李斌附

田仁朗

劉謙

劉福徐州下邳人少儻魁岸有膂力周顯德中世宗征淮南福徒步謁見于壽春世宗奇之因留麾下每出戰則令福率衛士為先鋒與破紫金山砦淮南

平錄功授懷德指揮使宋初遷橫海指揮使率所部
 隸步帥劉光毅由峽路征蜀比至成都孟昶已降大
 將王全斌部送降卒歸京師至綿州降卒盜庫兵劫
 蜀舊將全師雄以叛焚廬舍剽財貨以去刺史成彥
 饒以同華兵百餘人守其城全斌遣米光緒將七百
 騎及福所部以屯護之光緒盡殺師雄妻孥師雄領
 叛卒益聚村民十餘萬眾攻城益急會龍捷指揮使
 田紹斌率精銳百騎由東山西北行福領所部由山
 南行出賊不意夾擊之賊眾大潰斬首及溺江死者
 以萬計以功授虎捷都虞候繼隸曹彬麾下平江南

還授指揮使領蔚州刺史從太宗克并汾遷馬步都
 軍頭武州團練使端拱初出為洛州防禦使二年改
 雄州防禦使兼本州兵馬部署雄州地控邊塞常屯
 重兵福至部按行城壘調鎮兵以給繕完出私錢以
 資宴犒寇雖大至而恃以無恐矣淳化初遷涼州觀
 察使判雄州事二年卒年六十四贈太傅福雖不學
 而御下有方略為政簡易人甚德之領雄州五年郡
 境寧謐福既貴諸子嘗勸起大第福怒曰我受祿厚
 足以儉舍以庇汝曹既無尺寸功以報朝廷豈可營
 度居室為自安計乎卒不許既死上聞其言賜其子

四子介
身史卷三十四
嚴正
白金五千兩使市第宅

安守忠字信臣并州晉陽人父審琦為周平盧軍節度封陳王晉天福八年審琦出領山南東道以守忠為牙內指揮使領繡州刺史周顯德四年春改鞍轡庫使會淮南初下命守忠馳往宣諭時藩臣驕蹇遇朝使多簡傲守忠抗以正禮無所辱命未幾改衛州刺史宋初入為左衛將軍建隆四年湖南初平命為永州刺史乾德中護河陰屯兵蜀平太祖知遠俗苦苛虐南鄭為走集之地故特命守忠知興元府以撫綏之四年改漢州刺史時寇難甫平使車旁午公帑

不足守忠出私錢以給用每遣使太祖必戒之曰安守忠在蜀能律己以正汝行見之當效其為人也開寶初改濮州刺史會河決澶州命守忠副潁州團練使曹翰護役河決遂塞五年知遼州民有陰召并寇謀內應者事泄守忠悉斬以徇九年命將征太原守忠受詔與孫晏宣由遼州入既而與路羅若監押馬繼恩遇乃相與會兵入賊境燔砦四十餘獲牛羊數千議將深入會上崩乃班師太平興國初移知靈州在官凡七年雍熙二年改知易州徙夏州每西戎犯邊戰無不捷錄功就拜濮州團練使端拱中知滄州

改瀛州兼高陽關駐泊部署遷瀛州防禦使初守忠嘗夢一濮字方丈餘及領是郡幾二十年於是始寤淳化二年徙知雄州方與僚佐宴飲有軍校謀變擐甲及閹閹者倉卒入白守忠言笑自若徐顧坐客曰此輩酒狂爾擒之可也人服其量焉明年加耀州觀察使兼判雄州未幾召還條陳邊事敷奏稱旨賜錢五百萬五年又知滄州至道初移雄州三年復知滄州拜感德軍節度觀察留後徙宋州兼制置營田使威德兼著吏民不忍其去咸平三年入覲遣還未行暴卒年六十九贈太尉錄其子繼昌為供備庫副使

壻王世及為光祿寺丞守忠謹慤淡薄為治簡靜太祖居藩日素相厚善及受禪後每優任之守忠處之益謙從征太原多與謀略入軍知之者所至藩郡樂施予豐宴犒且喜與士大夫遊從故時論多與之初審琦以愛妾故為隸人所戕守忠終身不畜妓妾而喜佞佛蓋有所懲云

孔守正開封浚儀人幼事後唐明宗子許王從益漢初為東西班承旨事魏王承訓周世宗征淮南以材勇選為東班承旨宋初補內殿直兼領驍雄吐渾指揮從劉廷翰平蜀還遷驍雄副指揮使開寶中太祖

征太原守正隸何繼筠麾下會契丹遣兵來援晉陽
守正接戰於石嶺關大敗之斬首萬級獲其將王破
得時宋師之陷敵者數百人守正以騎軍馳之盡奪
以還太平與國中累遷日騎東西班指揮使太宗親
征晉陽守正分主城西洞屋領步卒大呼先登繼與
內侍蔡守恩等率騎兵力戰晉軍遂潰從征范陽至
金臺驛詔與劉仁蘊先趨岐溝關時城未下守正夜
超垣度鹿角臨機橋以大軍將至說關使劉禹使降
禹解懸橋守正遂入城撫諭其軍民以城守屬慕廷
朗而已赴行在時契丹兵在涿州東守正與傅潛率

御前東西班分兩陣馳擊之逐北二十餘里降其羽
林兵數百人繼與高懷德劉廷翰合兵追之至桑乾
河契丹自是不敢近塞以勞再遷日騎都指揮使領
濡州刺史端拱初遷龍衛都指揮使領長州團練使
出鎮真定是年秋出為潁州防禦使未幾太宗以其
練習戎旅特置龍衛神衛四廂都指揮使以授之改
領振州防禦使明年拜殿前都虞候領容州觀察使
一日侍宴北苑上入玄武門守正大醉與王榮論邊
功于駕前忿爭失儀侍臣請以屬吏上弗許翌日俱
詣殿廷請罪上曰朕亦大醉漫不復省遂釋不問俄

命為定州行營副部署受詔詣保州軍開道遇敵于曹河與戰數合梟首三十餘獲馬五十匹上聞而壯之淳化初擢高陽關副都部署軍中小將有言其校長者守正械送闕下取裁於上未嘗專決焉明年護浚惠民河塞澶州決河就命知州軍政慎州觀察使還領代州部署連移并代夏綏麟府三鎮與李繼遷戰大橫岡援范廷召出塞破賊于白池至行莊焚掠甚衆改代夏二州部署真宗即位復徙代州咸平初授昌化軍節度觀察留後守正上言四任鴈門邊亭久安願徙東北以自效會夏人入寇改定州行營副

都部署四年移彰德軍留後以風疾妨政改安化軍留後景德初復以不任職代時議防秋北鄙守正猶屢表請行上閱之不許無何卒年六十六贈泰寧軍節度使

譚延美大名朝城人軀幹壯偉少不逞遇群盜聚謀將行剽劫延美即趨就之及就捕法皆抵死延美以與盜素不相識獲免自後往來澶魏間為盜于鄉里鄉里患之周世宗鎮澶淵募置帳下即位補殿前散都頭從征淮南以勞遷控鶴軍副指揮使又從克三關時太祖領禁兵留督牙隊建隆元年補控鶴指揮

使稍遷都虞侯馬步副都軍頭征湖南與解暉分領
 行營戰權都指揮使時汪端寇攻朗州甚急招討慕
 容延釗遣延美率兵赴之大敗賊衆擒端以還擢鐵
 騎副指揮使領睦州刺史四遷至內殿直都知太平
 興國初為蘄州刺史連徙廬壽濠光州軍巡檢使劇
 賊之為害者悉就捕六年徙知威虜軍雍熙三年舉
 兵北伐命延美為幽州西面行營都監與田重進出
 飛狐北俄遇敵延美曰彼恃衆易我我宜出其不意先
 攻之即麾騎軍直進敵兵將潰大軍繼至遂敗之斬
 首五百獲其將大鵬翼以獻以功擢本州防禦使論

年改亳州出為鎮州鈐轄端拱元年徙知寧遠軍一
 旦契丹兵抵城下延美開門以示之不敢入圍城數
 日開門如故民出取芻糧者無異平日契丹卒疑之
 遂引去二年進邕州觀察使判亳州兼知代州是時
 任邊郡者皆令兼領內地一州處其家屬徙知潞陝
 涇州咸平四年以左領軍衛上將軍致仕六年卒年
 八十三贈建武軍節度子繼倫至崇儀副使雍虞部
 員外郎

元達初名守旻洛州雞澤人身長八尺餘負膂力善
 射家業農不任作苦委耒耜愧歎而去之事任俠縱

酒嘗醉見道旁槐樹拔劍斬之樹立斷達私喜曰吾聞李將軍射石虎飲羽今樹為我斷豈神助歟嘗從少年數十百人欲起為盜里中父老交戒之乃止時郡以戶籍調役達當送徒闕下行數舍乃悉縱之曰吾觀汝曹亦丈夫也豈樂為是哉可善自為計吾亦從此逝矣已而郡遣追捕至則達援弓引滿待之追者不敢近由是亡命山林間為鄉里患太宗居晉邸時達求見得肆帳下嘗侍太宗習射園亭命之射達射四發不中的已而連中上喜為更其名曰達及即位補御龍直隊長雍熙初累遷媯州刺史繼領本州

及時州郡部後亡命者上闕左右諷殺之達

曰此類竄匿者眾豈能盡殺之哉不如赦之以開其自新之路且以成好生之德上悅因悉原之端拱二年擢侍衛步軍都虞候領幽州刺史歷北面行營都部署由常山鎮入為京城巡檢淳化四年卒年四十二贈昭化軍節度達雖奮自草野歷職戎署至交士夫能折節盡禮人以此稱之

常思德開封人周顯德初以材勇應募隸天武軍累遷神衛都虞候雍熙初從曹彬征幽州因署牙校尋鎮威虜軍端拱初以弓箭直都虞候領溪州刺史淳

化中李順叛蜀命往夔峽招捕師次達州新寧縣調
近州土兵掩殺賊徒二千餘人于梁山時雷有終領
大軍抵合州境上賊衆二萬來拒思德與尹元裴莊
等合擊之合州遂平賊帥田泰正蘇榮據果州思德
因其遁而追捕之斬首八百果州既定餘賊保渠州
及走廣安梁山乃分兵為二抵廣安梁山者思德領
之趣渠州者元莊領之合力進討盡殲其黨自是川
峽賴以安靜無復憂慮以功真授汝州刺史初曹彬
北征不利至涿州左右皆潰散獨思德以所部護至
易州語人曰旣備戎行則與主帥同死生可也若

利害以為去就將何面目以見君父乎太宗嘗聞其
言至是陞辭深加慰勞且諭之曰為臣以忠實為本
汝少壯時旣以驍勇自効且能盡心于主將事朕之
日雖久而忠實如一今雖老亦當盡心乃職庶無負
乎朕之委寄也未幾移慶州路副都部署屯邠州咸
平初與李繼隆同部芻糧赴靈州以疾改陳留都監
換左神武大將軍二年卒年六十五

尹繼倫開封浚儀人父勲郢州防禦使嘗內舉繼倫
以為可用太祖以補殿直權領虎捷指揮預平嶺表
下金陵太宗即位改供奉官從征太原還遷洛苑使

四百令两个
充北面緣邊都巡檢使端拱中威虜軍糧餽不繼契
丹潛議入寇上聞遣李繼隆發鎮定兵萬餘護送輜
重數千乘契丹將于越謀知之率精銳數萬騎將邀
于路繼倫適領兵巡徼路與寇直于越徑趨大軍過
繼倫軍不顧而去繼倫謂其麾下曰寇蔑視我爾彼
南出而捷還則乘勝驅我而北不捷亦且洩怒於我
將無遺類矣為今日計但當卷甲銜枚以躡之彼銳
氣前趣不虞我之至力戰而勝足以自樹縱死猶不
失為忠義豈可泯然而死為胡地鬼乎衆皆憤激從
命繼倫令軍中秣馬俟夜人持短兵潛躡其後行數

十里至唐州徐河間天未明越去大軍四五里會食
訖將戰繼隆方陣于前以待繼倫從後急擊殺其將
皮室一人皮室者契丹相也皮室至既擒衆遂驚潰于
越方食失箸為短兵中其臂創甚乘善馬先遁寇兵
隨之大潰相蹂踐死者無數餘黨悉引去契丹自是
不敢窺邊其平居相戒則曰當避黑面大王以繼倫
而黑故也以功領長州刺史仍兼巡檢淳化初著作
佐郎孫崇諫自契丹逃歸太宗詢以邊事極言徐河
之戰契丹為之奪氣故每聞繼倫名則倉皇不知所
措於是遷繼倫尚食使領長州團練使以勵邊將淳

化五年李繼隆奉詔討夏州以繼倫為河西兵馬都監未幾以深州團練使領本州駐泊兵馬部署至道二年分遣將帥為五道以討李繼遷時大將李繼隆由靈環路往逗撓不進上怒急召繼倫至京師授靈慶兵馬副都部署欲以夾輔繼隆也時繼倫已被病強起受詔上素聞其嗜酒以上尊酒賜而遣之即日乘驛赴行營至慶州卒年五十上聞之嗟悼賻賜加等遣中使護其喪而歸葬焉

薛超遼州平城人少有勇力乾德初應募為虎捷卒從崔彥進伐蜀平錄功補虞候遷十將太平興國初四遷至天武指揮使從征太原領遊騎千人備禦鎮定境上以張軍勢及車駕還劫大丹頻寇鎮定侵掠無已超從大將劉廷翰率兵至徐河賊將領騎十餘出挑戰超躍馬直前連射數人斃敵勢遂却大軍乘之奮擊斬首萬餘級以功加步軍都軍頭遷神衛軍都校領叙州刺史雍熙三年從潘美北征至鴈門西陁路與契丹遇又戰敗之追至寰州斬首五百餘級其將趙彥辛以城降超連被創流血濡甲縷部分軍士自若乘勝抵應州其節度副使艾正以城降還加馬步軍都軍頭淳化初屯鎮州遷天武指揮使領澄州

團練使至道元年卒年五十七

丁罕者潁州人應募補衛士累遷指揮使從劉廷翰戰徐河以奪橋功遷本軍都虞候累遷天武指揮使領獎州團練使淳化三年出為澤州團練使知霸州會河溢壞城壘罕以私錢募築民咸德之五年以容州觀察使領靈環路行營都部署與李繼遷戰斬首俘獲以數萬計至道中率兵從大將李繼隆出青岡峽賊聞先遁追十日程不見而返三年真拜密州觀察使知威虜軍徙貝州咸平二年卒子守德能世其家

趙瑀者貝州清河人由衛士累遷龍衛指揮使亦以徐河戰功加鎮州團練使至兵馬部署至道二年卒于官年七十贈歸義軍節度使

郭密貝州經城人軀幹雄悍膂力絕人幼孤隨母適同郡

王乙因冒姓王氏以知瀛州馬仁瑀薦隸晉王帳下給事

左右太宗即位補指揮使復姓郭氏至淳化間凡八遷移

貝州駐泊兵馬部署會夏人寇邊以密有武略擢領安州

觀察使充靈州兵馬部署訓練士卒號令嚴肅夏人畏

服邊境賴以寧謐至道二年卒年五十八贈保順軍節度

傅思讓者冀州信都人少無賴有勇力善騎射太宗居晉

郎補親事都校即位補衛士直長累遷至平州刺史奉詔
 破契丹兵于唐興口端拱中四遷為容州觀察使知莫州
 移隴州上命殿中丞林特同判州事以夾輔之以思讓所
 為多不法故也至道二年卒年七十四贈保順軍節度
 李斌者青州人太宗在晉邸聞其狀貌魁偉召置左右即
 位補御龍直副指揮使太平興國中以太武指揮使領鄭
 州刺史七年坐嘗受秦王廷美饋道貶曹州都校雍熙三
 年遷營州刺史四年領溪州團練使遷為貝蕘二州駐泊
 都監淳化中繼詔累萊州洛州團練使勤於政理人服其清
 慎轉運使陳緯以狀聞於朝至道初拜桂州觀察使乃州

洛州徙滄州及代吏民不忍其去鄰境亦上其善狀
 詔書褒美之咸平三年卒年六十一
 田仁朗大名元城人父武仕晉昭義軍節度使仁朗
 以父任西頭供奉官太祖即位從討李重進攻城有
 功還與右神武統軍陳承昭浚五丈河以通漕運乾
 德中討蜀命仁朗為鳳州路壕砦都監伐木除道大
 軍以濟錄功遷染院副使太祖征太原與陳承昭雍
 泂水灌城城將陷會班師俄遷內染院使數日改左
 藏庫使為中官所讒太祖怒立召詰之至殿門命去
 冠帶仁朗神色不撓從容曰臣嘗從破蜀秋毫無犯

陛下固知之今主藏禁中豈復為姦利以自汙太祖怒釋止停其職開寶六年起為權易使七年以西北邊內侵選知慶州仁朗至率麾下往擊之短兵將接前鋒稍却仁朗斬指揮使二人軍中震恐爭乞効命遂大破之其酋長相率請和仁朗烹牛置酒與之約誓邊境乃寧爾書褒美太平興國初秦州羗為寇命仁朗屯兵清水會李飛雄事敗召為西上閣門使四年征太原命仁朗與閣門祗候劉緒按行太原城四面壕砦閱視攻城梯衝器械太原平留仁朗為兵馬鈐轄開廐使武再興軍器庫副使賈湜並為巡檢俄

命仁朗與再興役民築榆次新城從幸大名又命為滄州鈐轄俄遷東上閣門使知秦州九年判四方館事會議東封命仁朗自京抵泰山督役治道李繼遷為亂命仁朗率兵巡銀夏歲餘召還未幾繼遷攻麟州誘殺曹光實遂圍三族砦命仁朗與閣門使王侁副使董愿宮苑使李繼隆馳傳發邊兵數千擊之仁朗次綏州奏請益兵留月餘俟報會三族砦將折遇也殺監軍使者與繼遷合太宗聞之大怒亟遣軍器庫使劉文裕自三交乘疾置代仁朗繼遷乘急攻撫寧砦仁朗不知為文裕所代喜謂諸將曰敵人逐水

字四百八十八
草散保巖險常烏合為寇勝則進敗則走無以窮其
巢穴今繼遷嘯聚羣戎數萬盡銳以攻孤壘撫寧小
而固兵少而精未可以旬浹破當留信宿俟其困以
大兵臨之分強弩三百邀其歸路必成擒矣仁朗部
署已定欲示閑暇日縱其樗博下恤軍事上知之遣
使召仁朗赴闕下御史按問仁朗請益兵及陷三族
狀仁朗對曰所召銀綏夏兵其州皆留防城不遣所
部有千餘人皆曹光實舊卒器甲不完故請益兵況
轉輸芻粟未備三族若與綏相去道遠非元詔所救
昨臣已定擒繼遷策會詔代臣其謀不果因言繼遷

得部落情願降優詔恤來之或以厚利囑諸酋長密
圖之不爾恐他日難制大為邊患御史以其狀聞上
大怒切責憲府官吏曰仁朗不恤軍政得為過乎大
理遂當仁朗乏軍興及征人違期二十日以上坐死
上特貸之下詔責授商州團練副使馳驛發遣是役
也仁朗計已決為王侁等所構逗撓不進軍故及於
貶後數月上知其無罪召拜右神武軍大將軍部修
河北東路諸州城池數月而就留知雄州加領澄州
刺史時河北用兵大藩多用節將朝議以通判權位
不倫選諸司使有吏幹者佐之以仁朗知定州節度

副使事俄召赴闕未聞命而卒年六十時端拱二年也仁朗性沉厚有謀略頗涉書傳所至有善政雅好音律尤臻其妙時內職中咸以仁朗為稱首故死之日人多惜之

劉謙博州堂邑人曾祖直以純厚聞于鄉黨里有盜其衣者置不問州將廉知俾人故竊其衣亦不訴理即召詰前盜衣者俾還之直給云衣乃自以遺少年非竊也州將義之賜以金帛不受而去父仁罕輕俠自任五代末寇盜充斥仁罕率眾斷澶州浮橋以潰賊因誘獲數十人出芻粟不給官軍補內黃鎮將嘗因

事至酒家遇群寇暴集以計悉梟其首攜詣西京留守向拱補汜水鎮將俄為散都頭宋初遷許州龍衛副指揮使會王師征廣南為前鋒還改同州都校卒謙少感槩不拘小節初詣嶺表省父仁罕資以金帛令北歸行商還堂邑舊野嘗為鄉里惡少所辱謙不勝怒毆殺之亡命京師遂應募從軍補衛士稍遷內殿直都知至道初真宗升儲邸增補宮衛太宗御便坐親選諸校授謙西頭供奉官東宮親衛都知賜袍笏鞞帶器幣真宗即位擢授洛苑使謙起行伍不樂禁職求換秩改殿前左班指揮使給諸司使奉料咸

平初遷御前忠佐馬步軍都軍頭領勤州刺史加殿
前右班都虞候上幸大名至北苑屬謙有疾遣歸將
護謙懇請從行既俾其二子隨侍仍挾尚醫以從御
厨調膳以給之疾瘳毀所服鞍勒以遺中使上聞賜
白金二百兩駕還改捧日左廂都指揮使領本州團
練使四年遷捧日天武四廂都指揮使領本州防禦
使權殿前都虞候時高翰為天武左廂都校有卒負
債殺人瘞尸翰營中累日發土得之上怒翰失檢察
執見于便殿謙即前奏翰職在巡邏及閱教諸軍不
時在營本營事宜責之軍頭上為釋翰罪景德初加

侍衛馬軍都虞候改領河州防禦使俄權步軍都指
揮使明年冬制授殿前副都指揮使振武軍節度先
是謙久權殿前都虞候俄擢曹璨正授謙頗形慨嘆
至是璨副馬軍而升謙領禁衛焉河北屯兵常以八
月給冬衣謙上言邊城早寒請給以六月後以為例
無何以足疾求典郡上召見敦勉之大中祥符初從
東封上升太山詔都總山下馬步諸軍與西京左藏
庫副使趙守倫閱視山門設施有法者籍者乃得上
焉禮成進授都指揮使移領保靜軍節度明年八月
卒年六十贈侍中初謙將應募與同軍王仁德訊於

日者日者指謙謂仁德曰爾當為此人廐吏及謙帥殿前仁德果隸役廐中子懷懿後為東染院副使懷詮內殿崇班閣門祗候

論曰宋初諸將率奮自草野出身戎行雖盜賊無賴亦廁其間與屠狗販繒者何以異哉及見於用皆能卓卓自樹由御之得其道也劉福御下有方略所至著績受祿雖厚而不為燕安之謀可謂國爾忘家者矣守忠練達邊事提身謙慎弭卒旅之變於談笑之頃非善於行權者不能也仁朗沈教有謀累從征討綏州之役不惟無功而反坐逗撓豈其計之不善哉

特為讒邪所構爾自餘諸子皆積戰功以取通侯若延美之開門示敵思德之翼衛主帥繼倫之襲擊契丹薛超之裹創赴戰元達之請赦亡命郭密之訓撫士卒斯皆忠義仁勇有足稱者罕瑀思讓若斌若謙雖之奇功而亦克共乃職能寡過者也守正素練戎旅累任邊要而私勞肆忿視於勞謙之君子能無愧乎

列傳卷第三十四

字百三十六个

安身系作老三口

一八博伯序

刊



